

Aruba ta ricibi e prestigioso premio 'Internet Archive Hero Award'

Un bunita reconocimiento p'e Plataforma digital innovativo Coleccion Aruba



Internet Archive Blogs

Blog Announcements archive.org About Events Developers Donate

Aruba to Receive 2024 Internet Archive Hero Award for Groundbreaking Digital Heritage Initiatives

Posted on October 7, 2024 by Chris Freeland



MINISTER Xiomara Maduro ta informa cu dialuna, 7 di october 2024, Internet Archive a anuncia Aruba como e ganador di e premio anual Internet Archive Hero Award. Internet Archive ta reconoce cu e premio aki e trabounan di e Plataforma digital innovativo Coleccion Aruba.

Internet Archive ta un biblioteca digital gratis cu ta archiva documentonan di World Wide Web y ta haci esakinan universalmente accesibel pa tur hende na tur parti di mundo. E ta un di e bibliotecanan digital mas grandi y mas significante mundialmente y ta contene un variedad amplio di informacion y material manera buki, website, video, musica y hopi mas.

Tur aña Internet Archive ta otorga un prestigioso premio 'Internet Archive Hero Award' n'esnan cu a demostra liderato excepcional den haci informacion disponibel digitalmente rond mundo. Internet Archive a reconoce e esfuersonan innovativo di Aruba den pone su herencia cultural online via Coleccion Aruba y a nombra Pais Aruba como e ganado di e 'Internet Archive Hero Award' e aña aki.

Coleccion.aw ta un plataforma cu ta brinda e usuario informacion tocante nos historia y cultura. E ta un innovacion unico na Aruba y den nos region. Un plataforma digital cu Biblioteca Nacional Aruba, Archivo Nacional Aruba, UNOCA, Museo Arkeologico Nacional Aruba, Stichting Monumentenfonds, Plantage Zorg en Hoop y demas organisacionnan gubernamental y no-gubernamental a uni for a pa crea e Coleccion Aruba.

Minister di Cultura na nomber di Aruba ta gradici Internet Archive p'e gran honor di reconoce e trabou duro y esfuerso di nos Pais pa preserva y pone accesibel nos herencia cultural atraves di e Plataforma digital di Coleccion Aruba. *"E premio aki ta un gran estimulo pa sigui traha riba preservacion di nos cultura y historia. Danki pa sostene nos esfuerso pa mantene nos rikesa cultural bibu y accesibel pa futuro generacionnan."*

Minister Xiomara Maduro ta yama danki na tur e profesionalnan cu a traha duro p'e proyecto di Coleccion Aruba. E reconocimiento aki ta danki na trabou duro y esfuersonan di nos profesionalnan. E mandatario ta gradici tambe tur e partnernan di Coleccion Aruba y ta yama un danki special na Setar NV cu for di inicio a coopera cu e proyecto aki.

Pronto Minister di Cultura hunto cu representantenan di Biblioteca Nacional Aruba y Archivo Nacional Aruba lo ta presente n'e celebracion di Internet Archive na San Francisco, California pa ricibi e prestigioso premio di Internet Archive Hero Award.

Por lesa e anuncio cu Aruba ta Ganado di e Internet Archive Hero Award riba <https://blog.archive.org/2024/10/07/aruba-to-receive-2024-internet-archive-hero-award-for-groundbreaking-digital-heritage-initiatives/> y tambe <https://x.com/internetarchive/status/1843305852310360320>

Pabien Aruba, cu e bunita reconocimiento aki.